

# FORUM D'OC

Saupre se nosto lengo sara toujours gaiardo dins soun territòri moundialisa...



# Prouvènço d'aro

Tóuti li mes, lou journau de la Prouvènço d'aro

Mars de 2016

n° 319

2,10 €

## Forum d'Oc

Dissate 12 de mars

Pèr lou segound cop, lis associacioun aderènto au Forum d'Oc se van acampa lou 12 de mars à 13 ouro 30 au Councèu despartamentau di Bouco-dou-Rose pèr faire lou poun dis affaire toucant lou desvouloupamen duradis de nosto culturo e la plaço que pòu teni. Lou prougramo douna çai-souto devrié interessa e nous faudrié ana à bèu mouloun à Marsiho pèr escouta lis intervenènt nous assabenta de ço que se fai e de ço que nautre poudrian faire dins nòstis associacioun pèr marca la nouvello draio pèr preserva la planeto e lou gènre uman.

### Lengo e territòri vivènt Lengo d'oc dins un territòri moundialisa

Mouderatriço dis intervenciuon e debat: Madamo Eliano Tourtet, FR3 Méditerranée. 13 ouro 30: Acuei.

14our 15: Discours de duberturo pèr Madamo Martino Vassal, presidènto dóu Councèu despartamentau di Bouco-dou-Rose. Intervenciuon dis elegit counvida.

14 our 30: Pousicioun e demarcho dóu Forum d'oc pèr M. Guy Revest, presidènt du Forum.

14 ouro 45: Lou poun de despart d'uno poultico: quatre mes de refleissiuon e de debat sur l'equilibre e la preservacioun di territòri.

15 ouro 15: Duberturo vo autenticeta: Uno fausso alternativo. "Aïolisans complexes" pèr M. Christian Philibert, cineasto, autour des *Quatre Saisons d'Espigoule, Travail d'Arabe, le Complexe du Santon, Afrik'aïoli...*

16 ouro: Pauso.

16 ouro 15: Esperiénci, temouniage e referènci: Counfourta la lengo dins un environamen urban, pèr M. Mathieu Castel: L'Ostau dau País Marselhés - Mission Langue régionale des Bouches du Rhône: *Le bilinguisme occitançais dans une école en réseau d'éducation prioritaire*. L'espertiso d'un proujèt despartamentau: Valourisa e federa lis atour (ecounoumiquè, turistiquè, culturau souciau, istituciuonau) d'un despartamen à travers un labèu garantissènt qualita e autenticeta. La jouinnesso e l'aveni de la lengo. pèr M. Matieu Casanova, jornalista.

17 ouro 45: Debat.

18 ouro 15: Counclusiuon dóu coulòqui pèr M. Bruno Genzana, vice-presidènt dóu Councèu despartamentau delega à la lengo d'oc e is tradicioun prouvençalo. Couta lou role de la lengo d'oc dins lou proujèt de desvouloupamen durable dóu territòri prouvençau.

18 ouro 30: Aperitièu e counvivialita prouvençalo.

Dins li tèms que sian fau moustra pato blanco e vous demande dounc de nous anuncia vosto vengudo pèr courrié eleitrouni proche la secretairis [roseline.martano@sfr.fr](mailto:roseline.martano@sfr.fr) e, s'es poussible, lou numerò de l'autò que vous menara pèr poussé avé lou dre d'utilisa lou parcage pre-visit au Councèu despartamentau. Conseil départemental des Bouches-du-Rhône - Hôtel du Département, 52, avenue de St Just, 13256 Marseille.

## Coulòqui territoriau



## Noun de noun, se n'en garçon!

Avian anuncia lou mes passa que li deputa avien rejita uno proupousicioun de lèi toucant l'ensignamen immersièu di lengo regiounalo à l'escolo e tambèn poutant sus la presènci de la lengo dins la vido souciau, noutamen em'uno óbligacioun au Councèu Superiour de l'Audiouvisuau de viha à l'atribuciuon d'uno plaço significativo pèr li lengo e culturo regiounalo dins l'audiouvisuau francès.

Un pau encagna, avèn escriéu i deputa dis Aütis-Aup, dis Aup-d'Auto-Prouvènço, dis Aup-Maritimo, di Bouco-dou-Rose, dóu Gard, de la Vau-Cluso, dóu Var, emai de la Droumo prouvençalo pèr counèisse soun avejaire, emai fuguèsson pas esta presènt à-n-aquelo sesiho

de l'Assemblado Naciounalo: *Moussu lou deputa, Lou dijòu 14 de janvié à l'Assemblado Naciounalo se mené debat sus uno proupousicioun de lèi despasado pèr voste counfraire lou deputa bretoun, Pau Molac. Aquelo proupousicioun de lèi toucant li lengo regiounalo es estado rejitado. Diquen pas rèn dóu devé di deputa, n'i'avié que 24 en sesiho. Pamens aquéu tèste es esta rejita emé 14 voues contro, 13 pèr, e uno abstencioun, siegue 28 voutant. Acò se dis un bes-comte en prouvençau, mai passan...* Pèr nòsti leitour, forço estaca à soun parla famihau, aquéu vote es tourna-mai un biais autoursamen desdegous à regard de sa lengo e de sa culturo.

*Coume uno proupousicioun de lèi tant simplò, limitado à quàu-qui moudèsti requèsto, après un debat counsensuau de deputa tóuti favourable à la proumoucioun dóu "patrimòni" que soun li lengo regiounalo de Franço, a pouscu èstre rejitado, pèr quente escapadou? La meïouro responso sara de remetre aquelo proupousicioun de lèi à l'ordre dóu jour d'uno sesiho que vèn, e, estaca coume lou sias à vosto regioun, digas-nous que participarés à-n-aquelo ajudo à la sauvo-gardo de la lengo istourico di país d'oc?* Un bon cinquantenau de deputa de noste país an reçaupu aque-lo letro... Poudèn dire que sian bèn representa à l'Assemblado Naciounalo...

Nòsti preócupacioun podon èstre presso en comte... Nous lou sian souja qu'èro coume acò! Pecaire, soun à l'escouto, mai parlan pas la memo lengo... E fourçadamen, de noste vièi patoues, se n'en penchinon, se n'en trufon dóu rout coume de l'entiè... dins soun lengage diren: se n'en garçon coume de l'as de pico vo coume de l'an quaranto. Nòsti deputa an croumpa un grand chut à l'inanimeta... lis avèn desaparaula. Eiceptat pamens lou deputa dóu Gard, Cristòu Cavard, que nous a respondu e avisa qu'èro esta coussignatàri de la proupousicioun de lèi. Osco e gramaci à-n-éu, perdèn pas espèr!

### Rougié Gensollen

L'Associacioun Vareso pèr l'Ensignamen dóu Prouvençau es en dòu.

Pajo 5

### Retrouba si racino

Pèr nòsti jouine, à travès de l'usage de nosto lengo inmourtalo...

Pajo 3

### L'Escolo dóu Boumbardamen

Un Buletin en lengo nosto expandi en 1916 dins li trancado de la guerro...

Pajo 8